

La'ó Hamutuk

Institutu Timor-Leste ba Monitor no Analiza Dezenvolvimentu

Rua D. Alberto Ricardo da Silva, Bebora, Dili

Tel: +670 332 1040 Mobile: +670 7723 4330

Email: laohamutuk@gmail.com Website: www.laohamutuk.org



09 Dezembru 2022

Karta aberta ba Sua Exelénsia Prezidente da República Dr. José Manuel Ramos Horta

Asuntu: La'ó Hamutuk husu Sua Exelénsia Prezidente da República konsidera ho kuidadu molok promulga Lei Orsamentu Jerál Estadu ba 2023

Introdusaun

Relasiona ho Proposta lei Orsamentu Jerál Estadu ba tinan fiskál 2023 ne'ebé Parlamentu Nasional submete ona ba Sua Exelénsia Prezidente da República atu apresia antes decide veta ka promulga ho durasaun tempu ne'ebé konstituisaun permite – La'ó Hamutuk hakerek no husu Sua Exelénsia la promulga proposta lei ida ne'e tanba konteúdu husi proposta lei orsamentál ida ne'e la inklui estratéjia atu prevene Timor-Leste monu tama iha rai naruk fiskál ne'ebé sai tiha ona preokupasaun públiku iha fulan hirak ikus.

Semana kotuk, Câmara da Contas fó sai preokupasaun ida ne'e iha sira nia paresér kona-ba Konta Jerál Estadu ba 2021: *“[C]aso as despesas e as retiradas do Fundo Petrolífero continuem a crescer ao ritmo atual sem que novas receitas petrolíferas significativas sejam cobradas, o Fundo esgotar-se-á em cerca de 10 a 13 anos. ... [O] Fundo Petrolífero possa vir a acabar se os levantamentos excessivos continuarem a verificar-se. Está aqui em causa a sustentabilidade das finanças públicas sendo por isso urgente a gestão prudente das receitas petrolíferas para o benefício das gerações atuais e vindouras e que exista uma avaliação dos resultados e impactos alcançados nos últimos anos no desenvolvimento de Timor-Leste com a realização de transferências do Fundo Petrolífero acima do Rendimento Sustentável Estimado.”* Tribunal enfase *“Não observância do disposto na Lei do Fundo Petrolífero, no que se refere à utilização das transferências acima do RSE, as quais devem ser feitas no interesse de Timor-Leste a longo prazo.”*

La'ó Hamutuk nudár instituisaun sosiedade sivil ne'ebé tinan barak envolve iha prosesu dezenvolvimentu Timor-Leste nian liu husi peskiza, analiza no advokasia ba Timor-Leste ida demokrátiku liu no ekonomia ne'ebé diversifikadu no sustentável. La'ó Hamutuk mós sempre atua iha baze factual no baze ba evidénsia atu ajuda ukun rain sira hetan tan informasaun diferente atu loke diskusaun barak no hetan desizaun ne'ebé apropriadu ba interese tempu naruk Povu Timor nian.

Maske ami seidak iha oportunidade atu hasoru ho Sua Exelénsia Presidente da República atu hato'ó ami nian kongratulasaun – ho oportunidade ida ne'e ami hakarak hato'ó parabens no apresia ba prontidaun Sua Exelénsia nian atu lidera dala ida tan ita nian rai doben hodi hamutuk enfrenta dezafiu estruturál ne'ebé ita hotu iha nudár Povu no Estadu.

Felizmente, Lei Enkuadramentu Orsamentál foun loke espasu oportunu barak atu diskute realidade sósiu ekonómiku, atu rekoñese realidade no dezeña diresaun ekonómiku ida ne'ebé apropriadu, ekuidade no sustentável liu. Oportunidade ne'ebé kria husi Governu mak hanesan apresenta Lei Grande Opsaun no Planu ba Parlamentu hodi diskute planeamentu programatiku, Governu konvoka jornada rua, antes ba Konsellu Ministru no Parlamentu Nasional atu diskute no aprova proposta OJE ba tinan 2023.

Maske La'ó Hamutuk la hetan oportunidade atu ko'alia ba audiénsia ne'ebé Komisaun C Parlamentu Nasional organiza, maibé La'ó Hamutuk submete kontribuisaun analítiku ba iha deputadu sira hotu iha PN. Ami agradese katak Komisaun C inklui rekomendasaun balun husi La'ó Hamutuk iha relatóriu no paresér ba Plenária PN.

Sustentabilidade fiskál ba Timor-Leste

Asuntu sustentabilidade fiskál mosu dala barak iha oportunidade ne'ebé ami temi iha leten. Iha Ministériu Finansa nian apresentasaun no dokumentu ofisiál no diskursu sira hato'ó preokupasaun kona-ba rai naruk fiskál, liu-liu iha momentu ne'ebé Fundu Petrolíferu la hetan ona reseita husi atividade petrolíferu - kampu boot Bayu-Undan ne'ebé fó kontribuisaun boot ba Fundu Petrolíferu maran iha tinan 2022. Investimentu Fundu Petrolíferu mós sofre negativu boot. Iha periodu husi Janeiru too Outubru tinan ida ne'e, saldu iha Fundu Petrolíferu tun husi biliaun \$19.7 ba biliaun \$16.9, no bele kontinua atu tun.

Ami hakerek atu hato'ó ami nian preokupasaun ba Sua Exelénsia sobre realidade ida ne'e, preokupa katak tarde liu ita sei falta finansiamentu atu sustenta Estadu nian atividade no programa sira. Ami apresia katak Governu relata situasaun rai naruk fiskál no oferese senáriu balun, maibé la konsege define estratéjia orsamentál iha proposta OJE 2023 no projesaun kona-ba tinan sira tuir mai atu enfrenta dezafiu fiskál ida ne'e.

Rai naruk fiskál falta atu diskute iha Parlamentu Nasional momentu debate proposta lei OJE 2023, iha de'it mak proposta atu aumenta no planu ba gasta de'it, menus liu atu redús no redezeña diresaun ne'ebé diversifikadu no sustentável, liu husi prevene ita nian rai monu tama liu ba iha krize grave rai naruk fiskál. Bainhira ita monu tama iha rai naruk fiskál, ita tenke ko'a despeza barak inklui ita tenke aplika taxa ba setór fundamental sira ne'ebé pertense ba povu nian moris kada loron. Bainhira Timor Leste laiha osan atu mantén servisu públiku; eskola, sentru saúde - ospítal balun sei taka, sei hapara manorin, médiku, polísia no militar balun nian kontratu inklui laiha osan atu opera sentru elétrika rua Hera no Betano atu fornese enerjia ba rai laran tomak hanesan agora.

Sujere atu Veta Proposta Lei Orsamentu Jerál Estadu 2023

Ho preokupasaun sira ami rejista iha leten mak ami sujere atu Sua Exelénsia Prezidente da Repúblika uza nian kompeténsia Konstituisional atu veta Lei Orsamentu Jerál Estadu ida ne'e atu fó oportunidade ida tan ba Governu no Parlamentu Nasional no diskute kle'an liu tan hodi define planeamentu ida ne'ebé iha serteza forte ba ajuda prevene Timor-Leste monu iha rai-naruk fiskál no define investimentu no programa sira ne'ebé bele ajuda harii reziliénsia ekonómiku povu nian no sistema servisu públiku ida ne'ebé bele hetan kbiit ba sustenta ita nian rain ba tempu naruk liu.

Ami mós enkoraja Sua Exelénsia Prezidente da Repúblika atu fó oportunidade dala ida tan ba Governu no Parlamentu atu suspende projetu boot sira ne'ebé seidauk iha serteza ba retornu ekonómiku no finansiál hodi konsentra ita nian tempu no finansiamentu uitoan ne'ebé iha Fundu Petrolíferu ba setór produtivu, rekursu umanu no prioritiza ba investimentu ne'ebé baze ho analiza ba kustu, risku no benefísiu sira atu nune'e iha serteza liu tan ba hakbiit ita nian povu no rezulta ekonomia ida ne'ebé forte no sustentável.

Ikus liu,

Ami hakerek atu hato'o preokupasaun no sujestaun sira nudár parte husi aktu sidadaun responsavel ne'ebé halibur malu iha organizasaun sosiedade sivíl La'ó Hamutuk. Ami iha konsiénsia forte katak ami nian pedidu atu veta Proposta Lei OJE ne'e nudár kontribuisaun analítiku, sei la vincula desizaun Sua Exelénsia Prezidente da Repúblika nian.

Ami hanoin katak Sua Exelénsia Prezidente da Repúblika iha liu kbiit atu ajuda Governu no Parlamentu Nasional atu diskute fila fali Proposta Lei OJE 2023 no asuntu importante sira kona-ba finansas estadu iha futuru.

Ami rejista preokupasaun balun tiha ona ba Parlamentu Nasional no Governu liu husi submisaun iha oportunidade diskusaun OJE retifikativu ba 2022 no Proposta OJE ba 2023 – Ami mós tau dokumentu ne'e iha aneksu ba karta ida ne'e.



Marta da Silva
Ekipa Koordenasaun La'ó Hamutuk



Celestino Gusmão Pereira